

Dr. Joycelyn Elders:

“No papia di malesa sino di sistema di salud”

ORANJESTAD- Ayera mainta riba e prome dia di Health Care Conference Aruba 2015, Minister dr. Alex Schwengle a enfatisa riba dos componente principal den bida y den salud: felicidad y bienestar.

Felicidad y bienestar mester ta e elemento di mas importante pa wordo uza den tratamiento pa yuda nos comunidad, segun nos mandatario.

“Nos por papia di terminologia, mision y vision, pero enfoke principal den locual ami y ta desea pa contagia tur, ta di traha cu amor y brinda felicidad na esunnan cu bo ta trata den e sistema di cuida di salud, asina dr. Alex Schwengle a bisa.

Den Salubridad mita di e exito ta remedi y mita ta e refleho di e amor cu ta ehersce den e profesion. Un pashent y/o persona contento ta wordo cura pasobra e tratamiento ta traha, pero mas importante pasobra e factor felicidad a forma parti di dje.



Nos isla ta wordo reconoci como “One happy Island” caminda “HAPPY people” ta representa locual nos ta kere aden. Un bida yena di alegria, ta un bida saludabel. Ciencia a purba na varios ocasion, no obstante nunca por a comproba of yega na un splicacion milagroso di con hende cu ta biba feliz ta cura lihe.


Dr. Joycelyn Elders

Dr. Joycelyn Elders ta profesor distingui di Salud Publico na e University of Arkansas

School of Public Health y na Clinton School of Public Policy. E ta e di 15 Ciruhano General y e prome hende muhe Afro Americano pa asumi e posicion ey. Como e prome Afro Americano cu a yega den e funcion di Ciruhano General na Merca, Dr. Elders a trata topiconan hopi sensitivo como sexualidad di e teenager, aborto y legalisacion di droga. Un echo divulga pa e medio-nan di comunicacion y cu a bira un scandal na 1994, taba-

ta ora cu Dr. Elders a yega di bisa cu scol mester considera enseñansa di masturbacion como un forma pa preveni malesanan di transmision sexual di nan studentenan.

Dr. Elders ta un profesional cu ta gusta papia cla, y esaki a keda demostra durante su



disertacion tocante “Health Care Systems in Small Caribbean Communities” den cuadro di e prome Health Care Conference Aruba 2015, caminda el a haci hopi

enfasis riba educacion como instrumento of yabi fundamental pa un persona mantene su mes saludabel.

Igualmente el a destaca cu durante e congreso aki tur esunnan cu a papia ayera mainta a trece e mesun pensamiento di colaboracion y calidad, pero expresa den diferente forma. E doctor di 81 aña a bisa cu “nos kier biba mas hopi di un forma mas saludabel”. Un punto masha relevante cu Dr. Elders a trece dilanti tin di haber cu pa implementa un maneho di salud ta relevante pa consulta e comunidad riba kico nan kier y con nan kier logra esey. “No papia di malesa sino di sistema di salud”, tabata un frase di Dr. Elders cu a cay den bon tera entre e participantenan di e conferencia aki.

Pa ultimo el a trece un reflexion caminda el a laga sa cu esunnan cu ta traha den sector di salud publico mester comparti nan exitonan y asina e mehoracion riba e tereno aki ta bin di su mes. □